

四庫全書

集部

欽定四庫全書

集部

彭城集卷

三十七至
四十

詳校官庶吉士臣馬履泰

檢討臣何思鈞覆勘

總校官進士臣程嘉謨

校對官編修臣朱紱

謄錄監生臣鍾拔元

欽定四庫全書

彭城集卷三十七

宋 劉攽 撰

墓誌銘

吳公墓誌銘

公諱奎字長文姓吳氏居齊州之禹城五代之亂徙淮
州北海自徙至公不知其幾世而公會祖考皆未嘗仕
至公生而聰敏好學始授經藝祖母李氏因其篤志而

強教之年十六業成州郡舉以充貢明年遂中第與傳
卞于大問同時三人者皆以年少既命以官而許其歸
養親公時授施州清江縣主簿不赴後數年年二十始
調福州古田縣主簿歷開封府長垣縣主簿權廣信判
官宦官楊懷敏與河北屯田懷敏矜功專事盛氣自用
無敢與之抗者公獨上書論其不便時知保州事王果
亦與懷敏迭屢爭不從懷敏使人訟果它姦利事詔置
獄推劾公又為果辨其事曲直果竟得免而公始以強

直著稱矣河北轉運使以令舉監便糴故事糴中率者
得改京官倍之則為朝官公糴倍常數纔為大理寺丞
朝論以為未售乃除簽書武寧軍節度判官事前後守
將事無大小皆以委公監司有疑獄求清強官治之者
又多付公其為公所決平者無不愜服始公為小吏晝
則治公事夜輒讀書自六籍諸子史無有正偽無不觀
覽嘗不寐者積二十餘年性既開敏彊記不忘作為文
章覈實有法度由是中外大臣交口稱薦求得校書三

館中或侍講經筵其他稱其才能可任以事者章疏相繼也公遷太子中舍殿中丞自以朝臣得以抗言明白是非於是上疏論取士貢舉之法及時政得失九事又欲召見口論事仁宗深器之會舉賢良方正翰林學士葉公清臣等四人以公應詔對策高第拜太常博士通判陳州遷尚書祠部員外郎入為右司諫直集賢院明堂覃恩以起居舍人同知諫院事公始對策極論內降恩澤之為蠹政也及在諫官遂專以禁切左右於是近

臣有承用中旨而不言者坐而下遷及羣臣有因事僥倖雖已得官皆褫奪之朝廷為肅然御史有言事非其實者詔許問從誰受公奏言御史擇於風聞以言事朝廷用之以救過失使其擇之不詳朝廷能容之不能罪之可也若求主名則後莫有以事告御史者矣是自蔽塞其耳目也上立罷不問是時郭承祐有以舊恩為宣徽使知應天府事數妄作不中法度又張堯佐以後宮戚屬自三司使為宣徽使公連上疏極諫終之承祐奪

宣徽使堯佐雖不去位出知河陽是後遂不復遷官上
又著令后妃之家不得為執政官云其他排擊非義救
解過失條舉善政顯用才士巨細疏密苟為有知必言
言之不從未嘗但已也時因天變為上推致休咎而舉
人事消復之應上嘗聽受之賜緋衣銀魚頃之出知密
州徙兩浙路轉運使未幾召還判登聞檢院糾察在京
刑獄同修起居注遷兵部員外郎知制誥賜紫衣金魚
奉使契丹契丹羣臣為其主加稱號相與行禮唱公使

入賀公自以使事有職賀無預也不為徃契丹主畏其
守義甚重之及還中路與敵使遇敵人衣服以金冠為
重而紗冠次之其與漢使接衣服重輕皆有以相當至
是敵人紗冠邀漢使盛服公不許亦殺其禮坐是二事
出知壽州召還同判吏部流內銓知審官院同知通進
銀臺司兼門下封駁事吏部審官銓能否銀臺主司出
納公所至綱目修舉其所建言改更糾正雖至於拂上
意不憚為之兼判集賢院尋為翰林學士權發遣開封

府事公明於從政前後歷兩郡皆著治稱人知未盡其能也及領京師獄市浩穢公應事敏速吏不敢欺富人孫氏京師大豪專權財利負其息者至評取物產及其婦女公發其宿罪奏徙逐其兄弟於淮南福建而羈管之豪猾畏威斂手居三月聲聞赫然遷端明殿學士兼翰林侍讀學士知成都府公以父老苦辭改知鄆州凡四月復召為翰林學士充羣牧使兼史館修撰遷左司郎中復權知開封府兼畿內勸農使嘉祐七年三月拜

左諫議大夫樞密副使初仁宗皇帝春秋高而皇嗣未立公自為諫官即為上言天下大計願早有所係其後因大水日月蝕之變又以為言天子察其至誠及為學士因奏事上留語曰將有所置以維大本公再拜賀因復進勸已而皇子遂定英宗即位公遷給事中再遷禮部侍郎公辭不拜詔報不許曰卿在西掖有儲貳之言人乃知公嘗密謀定計也時樞密使富公張公舊皆嘗薦舉公而與同列時人榮之會丁父憂去既卒哭天子

必欲起之再使內臣往又召公子男璟上殿諭旨故事所未嘗有也公固請終喪上不得已許之召給半俸用璟為鄆州判官公又辭俸許之公性至孝居喪毀瘠甚廬於墓側終喪不飲酒食肉不至城邑既服除先帝升遐即吉然後赴國哀召臨梓宮今上見其羸瘠驚問之甚諭使自頤養時方藉卿復以為樞密副使時四年二月也月餘除參知政事又月餘改資政殿大學士知青州事兼京東東路安撫使居二日上復留之九月以公

疾遂復行前命公至青十日疾病上疏求徙兗州不許
七月二十七日薨於位年五十八初公為學慕韓退之
及有疾謂子璟曰吾年既過退之矣已而竟不起若知
命然上為輟視朝一日贈某官謚曰某積階至金紫光
祿大夫勲至上護軍爵開國公食邑二千戶實封四百
戶賜號推誠保德翊戴功臣考諱某以公貴初為將作
監丞致仕稍遷及公拜樞密至太子賓客耆耄壽終後
公歷二府累贈金紫光祿大夫太師祖諱某贈金紫光

祿大夫太師中書令曾祖諱某贈金紫光祿大夫太師
曾祖母王封某國祖母李封譚國前母王封莒國繼母
王封安國皆號太夫人初公遷三世葬於鄆州東阿縣
孟柵里公徙柵焉時熙寧元年某甲子也公初娶趙氏
父名立為遂州遂平令再娶張氏父名興為郊社齋郎
張封延安郡夫人仁宗明堂公求為趙氏追封亦得贈
信都郡夫人公五子長則璟為大理評事環祕書省校
書郎瓊瑄皆未仕幼未名女五人長適都官員外郎胡

授臣早卒次適大理寺丞王孝寬次適太常寺奉禮郎
呂元淳三尚幼公初與鄉人王彭年善稱道其能為致
名宦彭年客死於京師公使長子主喪事周恤其家嫁
其二女焉及他姻族有不能自存者為畢嫁娶數人以
錢二十萬買田北海號曰義莊以賙親戚朋友之貧乏
者公自謂學韓退之此又其次者也故其終家無餘財
諸子無宅以居嗚呼可謂篤義君子矣可無表哉銘曰
矯矯吳公矢言正色是曰諫臣國之司直提綱絜維補

窾苴隙或謀於幾密焉無迹祿不獨豐推以施遠位不獨享脩以進善公睎古人心慕身踐言長課多彼古亦鮮其志獲伸而年則那其壽不遐而名不磨即宮於泉公乎奈何勒銘不忘如山如河

贈兵部侍郎王公墓誌銘

公諱嘉言字仲謨翰林尚書元之之次子翰林以文章正直著名兩朝而公幼好學未嘗嬉戲翰林最愛之人亦以為宜其家兒也生十三歲而丁翰林喪哀毀過甚

有成人之風事母福昌太君以孝聞翰林之亡遺言不
為子孫乞官真宗聞而嗟悼賜公同學究出身後數歲
公益成人貧無以養調官於吏部而年未及格判銘事
周起以聞於朝特授鄂州司戶參軍祥符五年舉進士
第改揚州江都尉七年上閱書龍圖閣得翰林奏疏愛
其切直因訪後嗣孰賢近臣以公名聞而曰能世其家
遂遷大理評事監海州稅天禧元年用薦者言徙知廬
州舒城縣兼榷茶稅丁福昌憂服除知蘇州長洲縣縣

既翰林舊治而公年與官又皆同士大夫賦詩榮美之
遷大理寺丞仁宗即位遷殿中丞徙知南雄州代還遷
太常博士通判齊州工部侍郎李及薦御史以公洎張
錫二人應詔故事當擇用其一而上謂執政曰及清慎
少許可此皆時俊也遂並用之召為監察御史遷殿中
侍御史判三司開拆司奉詔案信州獄還賜牙緋明年
出為福建轉運使賜金紫明道元年恭謝禮畢遷侍御
史入為兵部員外郎三司鹽鐵判官景祐二年出為京

東轉運使夏四月感疾卒於廣濟軍之官舍享年四十
七公性厚重宏深不妄喜怒外嚴內恕善於為治守南
雄時開大庾嶺故道往來便之郡當二廣之衝行者交
錯去水即陸易輿以舟有至者輒滯留旬浹公一皆善
視之以已俸給費未嘗毫髮擾人通判齊州時郡守性
剛烈視僚佐蔑如也公正色持法不為少屈郡事賴以
平允守後徙治他郡坐事下獄每嘆曰同僚得如玉御
史無此咎矣其為御史所論列必時政大體未嘗掇拾

小過挾發陰事天聖中洞真宮壽寧觀災兩宮有意修復公力諫止之信州鉛山富民程氏獻石綠數萬斤詔蠲本戶徭役公爭以謂所獻有限而所蠲無窮天下豪族皆以貨得蠲則貧民將獨受其弊上用公言復程氏三歲而已為轉運使部吏有過失屏人面數之皆慙服悔謝得自改郡縣大治其薦舉士尤推精鑒故參知政事吳公奎初調福州古田主簿天章杜公杞以廷尉評監建州茶公皆薦之其後顯達人謂公知人平居閱書

史為辭章以嗣續前烈為志手寫翰林小畜集三十卷
藏於家獻翊政論十篇究切世事仁宗嘗錫宴苑中時
得唐明皇刻石山水字使羣臣賦之皆不能下筆奏篇
纔十數上令宰臣銓次之公第為優初丁晉公舉進士
時翰林為推挽延舉卒使成名及其當國嘗語公曰先
正引薦之德未有以報公曰相公逢時得位當以直道
報國無恤私恩也晉公不悅公亦不復至其門逮朱崖
之貶捕治黨人公獨不預焉豈所謂上交不諂其知幾

者邪惜其蘊蓄未及大施中年而隕其命矣夫朝廷聞其喪賜一子官又命其長子自大名尉易右班殿直監曹州稅使不以喪去有祿以濟其貧云公娶周氏先公亡公卒後三十餘年以子貴累贈兵部侍郎周夫人追封僊居縣太君以熙寧二年七月二十一日葬於開封府開封縣宰輔鄉鳳池里先塋之次公四子長曰延度前潭州觀察使次曰延禧庫部員外郎通判荆南府次庚庚未仕二女長適故壽州錄事參軍杜襄次適進士

張誘孫七人鴻浩淮汴漸淑沆浩為廣州東莞尉餘未
仕公之葬公從孫度支員外郎集賢校理同知太常禮
院汾實與裏事集賢君以某同官使來請銘某叔父祕
書監往為建州從事公薦之升朝是某世有舊乃為銘
曰

翰林之生正直自信驟進無愧屢黜不愠宜有後人嗣
守其訓譬彼川流其源已濬公幼而學守其家法天子
矜之始優以祿文施於謀智効於職果其世賢罔有不

克遂司風憲奉使察舉施未及光業其有緒天奪其年
有蘊有貯四方馳驅躋於中路公歿餘慶軍後昆矣贈
官貳卿由子恩矣祔於先塋屹其墳矣請銘惟誰公從
孫矣

故將仕郎郡守太子中允致仕賜緋魚袋蔡君墓
誌銘

熙寧四年秋銘塘蔡子難將葬其親中允君請銘於彭
城劉某某與子難為同年進士又同省郎官又同守海

陵其於子難哀喪恤憂所宜述也孝子之事莫重於葬
葬而垂名後世者莫重於誌銘是其深長思勿之有悔
焉爾某其何辭雖然中允君潛德遯時不顯其光功不
於人於其家吾將何言以表之尚書屯田郎吳君君平
以狀告曰君孝友惠和人也曠遠有識慮幼而好學家
貧無以自給乃始勤力治生十餘年間家事給足瞻及
鄉里施予不倦族人與君別籍既復求分財君亦推與
族人後貧不能自存又收養之君之家疎遠而聚居者

百餘人存撫教導凡五十餘年始卒如一鄉里宗族於君無怨尤而更稱譽君殿中丞盧君中甫曰凡富而多怨者專利而不顧也愈富則愈纖嗇剝刻徼射人與為仇蔡君則不然其於鄉里視貧下者愈矜之厚施而薄責故遠近歸心秉常為錢塘官終三年中亢君未嘗以豪髮見求可謂善人矣秉常為君拜鄉里之仕宦者莫不屈下之君凡二子長則子難君教子難讀書恣其與賢士遊費用不計子難成名才學幹力見稱於時有位

於朝出為郡守及君存見之善人報施之效歟某曰二
賢士之言可以信後世吾其何辭蔡氏本望陳留自司
徒謨過江子孫散居吳錢塘之蔡未有顯者蓋自君父
子始君諱某字某子難初登朝英宗即位推恩君始命
為大理評事其後郊祀及今天子即位郊祀三遷至太
子中允子難當賜五品服又推以授君享年七十二以
葬前一年十一月某甲子卒子難時為職方員外郎知
泰州事次子曰說亦舉進士君四女子皆嫁名家京兆

宋顯穎川陳惟億太常博士葉昌言餘姚縣主簿錢堯卿其壻也君聚余氏追封錢塘縣君先三十歲卒君卜葬於吳山鄉吳山里斥廣其地衆為兆城曰兄弟子孫葬而相從死生之義備矣有告曰是於陰陽之說為不利請徙之君不許刻石墓門戒子孫毋以妄求福及君之葬祔之某日某甲子也銘曰

蔡君不仕而家事治宗族歸之疎遠不棄鄉里親之愈下愈施克生賢子以振其世郎官郡守實顯實遂天祐

君年宿留待遲命官四遷於朝有位朱衣符帝以更
賜古云五福獲以備四黃髮歸全靡悔靡愧卜葬吳山
君徃戒誓宜於後人是固是利

右侍禁江君墓誌銘

君諱某字某姓江氏祖某父某贈某官季父某為度支
郎中君少讀書善寫古篆字用筆精健有法士大夫家
多葆玩之用季父蔭為三班備職五遷至右侍禁歷州
郡官亦五任一監漳州龍巖銀銅又監荆南白沙鹽酒

其後三任皆在廣南為兵馬監押始居容州遷化州末在雷州遂終於官年六十九異時仕宦嶺南者常患其地荒雜惡草毒蛇海祲山霧鬱蒸蓄積中人為病或以為死不得盡其天年而君居之且二十歲壽幾七十與齊州中氣無以異然天命固有所制也而君亦可謂果於從事而知命矣君凡三娶夫人魏氏林氏陳氏皆先君死男子二人曰沛魏出也曰潛林出也女子三人其二人與潛同母一人魏夫人所生沛早死潛舉進士女

皆嫁士人江氏自君祖以上占數南劍州度支始葬江
州德安度支之孫懿叔於君為從父兄弟之子君歿後
諸孤幼懿叔皆養視之迨其長大為畢婚嫁又迎君喪
相葬德安去度支墓若干里以林氏夫人從君歿于慶
厯某年月日後若干年得嘉祐某年某月日襄事懿叔
時為衛尉寺丞銘曰

江本小侯見於春秋其後以國為氏名數遷徙或以官
為家乃不可紀延平之江遷於德安自君季父始季父

之孫再世而相卹厚生周死稚婢有立宅兆用完不知其遠矣納銘墓中萬有千年母有壞毀

內殿崇班康君墓誌銘

內殿崇班康君諱某字某生二歲失父三歲失母育於大父及長大孝謹詳慎事大父竭力盡子職念慮之所及筋力之所能無不備具器皿衣服飲食藥餌必躬進之如是者二十七年未嘗一日離也大父官職難劇亦未嘗不隨及大父將求致仕君預為營居處計生事什

物纖微必具如大郡大府始至官矣大父終君哀毀逾禮卜葬陳州宛丘縣松柏皆手植刻石誡子孫無毀伐者初大父愛君育為己子十歲蔭為官君讀書書好學善為詩人多傳誦之者賈丞相文元公見而悅之謂曰我薦士可得進士出身君謝不願曰兄弟皆已出仕吾親以我獨留為恨吾懼其戚戚也方衣道士服而講養生事以示無仕宦意而吾親安之其可以從公辟乎文元公嘆息稱善既終喪乃出仕初監亳州衛真縣鹽酒

稅會縣令闕州使君攝之田訟有十餘年不決者君為
辯明之歲凶賑恤其餓者疾病予之醫藥民以不流殍
咸願得為真都水使者辟君巡惠民河河水貫京師秋
夏漲溢則為虞前此者都水為木閘尉氏西為水暴至
則將閉隔之既又懼其衝激敗壞遂不敢閉君使治水
遽以殺水勢是歲水漲數丈閉閘以禦之閘安固自如
而京城無水患云官滿留再任有欲薦君治大河者君
辭曰官卑利害不專在己大河事非小川比也陝西都

轉運使奏舉君為鳳翔府監押兼買馬未行定州路安撫使辟勾當廣信軍榷場榷場在軍城外有障壘而無防兵不置兵器會北寇十餘夜襲軍城箭射榷場如雨時君宿場中安存北客之在者率直兵與守門卒自壘堞上投磚石擊賊賊遂散去官滿辟管勾順安軍順安寨此兩薦皆安撫使樞密直學士薛向力也其後西方用兵樞院選軍赴涇原路準備可為邊守初權原州後威勝軍其在原州計漕給軍內嚴守備存撫老弱招集

流散事皆濟辦後以國有營造程督技藝使者按視旁
午急甚君戒主者不得過為鞭朴百姓安之有嘉禾隔
五壟合穗者民以為善政之祥既二年有餘君自以老
厭事願退而就閒求管勾中嶽廟詔許之時君甫年六
十二云未除以疾終君自為借職凡八遷官三以覃恩
一以大父遺表餘皆磨勘年勞勲騎都尉初大父既以
君為子君念父甚至為傷大父意未實敢言及身登朝
可以追榮先世君益自悼恨遂言於朝求改正昭穆未

報詩集十卷藏於家君父某大父某某官曾祖某某官
君娶閭氏封長安縣君生三子長曰倚某官次曰位進
士及第某官少子侑亦舉進士君以某年某月日葬宛
丘縣受節鄉東原祔果州之塋康氏世河南洛陽人自
果州葬陳遂占籍宛丘銘曰

孝友篤行是施有政顯允康君為孫之令生集休譽沒
將餘慶東原祗平卜亡其應表衆作塗種柏為廷宜爾
後人娛娛其盛

故宣德郎守大理寺丞知隴州沂陽縣事王府君

墓誌銘

君諱伯先字孝公其先系出於琅邪五代之亂自太山徙江東至君曾祖德輝仕李氏為羽林參軍江南平徙居六合君祖諱可則以孝謹聞州里兩世皆隱不仕至君父綸以進士舉中第官至太常博士告老致仕以令得一子官君補太廟齋郎初調通州司戶參軍始至官有告婦罵姑折其齒者獄既具君獨能察之以直其冤

郡守悅服因使攝海門縣事校戶籍第其高下君以術
參伍知之貧富無差由是益有聲以父憂去服除為錢
塘縣主簿用使者薦再遷潤州金壇縣令縣多陂澤民
以漁釣為生而豪富人規占陂湖各有分地自擅入其
中者則執以為盜君悉使表識顯其疆畔於是豪富人
名占有限而細民漁釣有所後莫相犯而獄訟衰息矣
會郡守有求於君不能得恨甚時獄有囚病死者即奏
抵君坐去官吏民人人冤惜之初君伯兄名某不喜為

吏故以官與君而閒居海陵及君免歸亦自以剛特寡
合遂將退伏不出家族故舊人人敦勸久之乃復為商
州錄事參軍諸公交薦其才三年代還猶以金壇事纔
得應天應推官然上旨許其遷矣自應天府還遂除大
理寺丞知隴州汧陽縣事君性端厚亮直為文敏速遭
事明辨名公鉅人多知之者勢可顯仕於朝而中以文
法齟齬躋踣似有命者然君奮迅自振而名公鉅人終
相之以出於厄窮滯淹與夫遭命而顯仕者不辨也君

年若干伯氏年若干其將往沂陽縣歸省其兄至家之
五日無疾而終熙寧三年十二月十一日也君娶江氏
故某官某之妹生子彭拜為密州觀察推官女嫁某官
江夫人前君若干年終葬於六合王丞相誌之君合祔
焉以君卒之明年二月某甲子鄉曰永福里曰梅原王
氏祖墓也銘曰

君敏從政事稱其賢惡吏困之乃仆而顛善人佑君咸
竭其力如滌垢取白如伸鉤取直其卒有成而縣以歲

月迫君之邊年則耆耄於生無厭於歿無悔誌銘泉宮
萬世勿壞

彭城集卷三十七

欽定四庫全書

彭城集卷三十八

宋 劉攽 撰

墓誌銘

翰林侍讀學士給事中唐公墓誌銘

公諱某字彥猷幼清警介特其守氣精壹而內志端直
故其于為學深而簡文章高聳具以應物不煩而達規
矩繩墨絜然有常而枉直判于彼矣始皇考待制公以

清修著稱而公能世之士大夫論賢父子多舉唐氏云
公初以廕為將作監主簿天聖間獻所為文章召試學
士院賜進士及第除知湖州長興縣以憂去其後四遷
至太常博士歷知華亭諸暨縣梧州歸州用近臣薦拜
監察御史未至都丁太夫人憂既除服而薦公者適當
執政以故事避嫌出知廬州御史中丞張公方平言于
朝上因為留公公既在朝言事舉大體其所刺譏不避
權貴初詔書設六科以求士謂之賢良方正茂材異等

而許人自薦又三歲輒一舉士大夫徒以文詞進無益
于治也公始建議請使公卿薦賢良又欲如漢故事須
天子特詔乃舉之不以歲年限也天子使兩制近臣議
參知政事吳公有以為不可許論難上前遂寢公自以
所言直獨不可大臣意故見沮格耳即大臣有過孰當
言者章疏凡七上不能得徙為工部員外郎直史館知
湖州吳公為御史者也公持正不阿如此其後制舉亦
竟使近臣薦之用公初議也遷江南西路轉運使總六

路漕運有建議欲自重其權者請使六路諸轉運使事皆稟已其于文移當如郡縣上臺省不如是漕事不集朝廷從之諸路皆承命不敢有異公獨以謂賦入有經轉運使不待督責而足即凶年饑歲雖盛督責猶無益也今事皆稟已是將以勢臨之有求將必取盈非祖宗之舊上疏爭之朝廷猶欲伸前議乃徙公福建路居頃之發運使亦復自請罷其議云明堂覃恩遷刑部員外郎入為三司戶部判官改判磨勘司張堯佐由女寵驟

用公數刺譏堯佐陳丞相執中故嘗請建上為儲貳天子以為其功厚報之公復為上言執中何得為功上不以為忤待公甚厚出為江南東路轉運使入辭上謂曰吾今召卿未至江東修起居注闕上遂用公補之頃之召試知制誥賜金紫判流內銓遷禮部郎中奉使契丹還曾丞相在政府與公親嫌出知蘇州徙杭州數歲徙青州遷吏部郎中道拜翰林侍讀學士今天子即位遷諫議大夫召還勾當三班院判太常寺兼禮儀事遷給

事中治平元年十月九日薨于京師年六十詔贈禮部侍郎予四子官賻贈加等公善與人交意所許與堅不可間其所不可不假借矯強以為歡性嗜書畫研墨尺牘與人多珍藏之未嘗問家有無田園皆推以予他昆弟始娶蕭氏再娶陳氏皆先公卒子四人某三女子唐氏本魯北海人自公五世祖徙家杭州曾祖諱某仕錢氏為鹽鐵巡官累贈諫議大夫祖某衢州龍游縣令累贈工部侍郎考諱某天章閣待制贈尚書左僕射數世

皆葬其鄉里公之為杭州歲時盛車騎賓從上塚鄉里
榮之及公之薨後一年某日月從葬于先兆以夫人陳
氏祔銘曰

唐氏居吳迨公五世由祖及孫浸以顯貴其貴維何侍
從帝側褒章賁璫輝光幽安維其令德有繼有承其德
維何直哉惟清公葬舊墓有祔有從永世不忘寘銘公
宮

故朝散大夫尚書虞部郎中致仕上騎都尉皇甫

君墓誌銘

君諱鑑字唐弼曹州乘氏人曾祖鄴號州閭鄉令祖明
綿州彰明縣令贈尚書兵部郎中父載尚書屯田郎中
贈禮部尚書君少學問以馴行稱于鄉里由父廕得官
初調台州司法參軍斷獄詳平郡人皆愛之請于轉運
使求以為州幕職官轉運使段少連謂人曰掾曹勢不
能動人此其真善也為請于朝不從再調單州單父縣
主簿會陝西用兵詔籍山東民為鄉兵轉運使張公奎

以濟單二州謫君法雖以三丁取一而一家兄弟子姪
未有約束莫適取也百姓訟訴紛紛君乃曰曷均兄弟
之子先取其多寡等擇其壯者民乃悅服張公稱善教
諸郡以單父為則薦君為東阿令勅既下君以親在南
方辭不受調通判錄事參軍三司舉君知光州光山縣
兼買茶場事吏市茶求以多贏為最常數倍取之下戶
益困至君不以一毫過數民皆樂輸無逋負者百姓販
私茶犯法君曰貧民以茶養生亦何異于為農不忍繩

以重法郡守以問君對貧民不得販茶且為他盜罪辟
益重不如容之使有以自存縣吏張盛猾惡為上下患
君收治寘法餘吏戰栗終君之任無敢犯令者官滿以
考課轉大理寺丞知并州錄事參軍曲陽縣民兄弟訟
者兄告其弟非同父不分與田產弟不能自明縣邑久
不決府使君治之君使人按視其父母葬告曰彼雖無
石銘棺槨外當有題志者于是驗之果悉書其子孫名
字而其弟在焉訟者于是首服河東用錢銅鐵二品均

等鐵錢輕又盜鑄者多詔變其法以鐵錢三當銅錢一
百姓奪貨失業市井譁噪經略使鄭公集衆官謀之君
曰小民失職無聊宜使人往慰之耳鄭公使兵馬都監
謝雲行出諭之民因求見太尉既入鄭公捕其唱率者
將刑戮之百姓皆哭君曰民以無聊故願見公公重困
苦之衆怨且怒將不可解鄭公乃止君又曰蕪井之家
典質錢舊出十乃今償三十何厚幸也而貧民失業又
兩倍輸此其所以患新法之變耳今使以舊數償雖不

利兼并之家可以悅衆從之而軍中猶疑縣官出錢刀
猶用舊法相與竊議謀變鄭公憂之君曰兵今當給料
錢比文書具更厯勾院猶二三日久可不俟文書具給
之後徐入勾無害也于是人情始安鄭君以是甚重君
年勞改太子中舍明堂汎思遷殿中丞徙綿州什方縣
君以母老請得之監徐州利國監以母夫人憂去服除
遷國子博士簽書淮陽軍判官賜緋衣銀魚駐泊兵韓
遂殺都監率衆叛去知軍事韓儼恐駭不知所為君曰

此疲卒主將遇之酷虐忿而報怨快意非有他謀不足
畏儼畫閉城門君使開之以安人心叛卒稍稍散亡君
曰可因而招來也自持錦袍往當要路呼諭之至暮亡
者皆集部吏分索其餘旬日皆盡改尚書虞部員外郎
厯比部通判德順軍事以所生母憂去除喪通判瀛州
事今上登極遷駕部又遷虞部郎中是時霖雨大河漲
溢又深冀二州流潦猥集河堤內外浸灌危急甚君晝
夜行視培裨窒塞堤得以不敗已而河北地大震瀛州

最甚壞城壁舍屋無完者天雨不止軍糧皆暴露君為
作苦園稍稍覆蓋創築城壘力自督視凡百餘日乃復
堅峻而後疏猷積水乾下濕地出田數萬頃朝廷遣安
撫使二人巡視河北先是侍御史張紀按獄永康軍獄
具請君錄問君視獄情有不盡者隨事駁正張御史不
悅以酒食饋君不受張重以為恨去與安撫使遇于國
門外毀君不職二使者不察既至瀛州則奏罷君君安
然受之無憾知瀛州高陽關安撫使侍制李公肅之與

君同救蓄患慮土役者上書為君訟不直舉所完軍儲
為證凡一百二十餘萬石朝廷乃下轉運使提點刑獄
覆實果皆以優最聞君由是復舊二使者生奏舉不實
以赦免罪去後日李公還朝方奏事上自首言曰皇甫
鑑已還其舊差遣李公因道君勤力事上曰是乃辛苦
人也君除通判廬州事緣瀛州修城得勅書獎諭加賜
銀絹無幾君求以本官致仕詔許之除一子官為試校
書郎君持身清苦雖為郎官五品猶若微時故其謝事

就閒果決無攀戀心養視兄孤子不異己出亦不為子
孫多營業曰不如教使治心田也君年七十五終于乘
氏縣里舍皇甫氏本望安定君五世祖統始居開封府
考城縣葬桃花崗高祖勤避後唐兵亂走蔡州西平為
西平人及君祖嘗為乘氏縣尉因留居乘氏其後墳墓
皆在乘氏某鄉某里君嫡母劉氏贈壽光縣太君母李
氏贈長安縣太君君娶李氏故翰林侍讀學士仲容之
女封崇德縣君子四人長己同蚤亡次琮某官次琪某

官次環某官女七人皆嫁士族君以熙寧七年三月終
葬以元豐四年七月某日某祧祔尚書公之域西偏少
南君將沒教子弟竊于是惟庚穴云銘曰

皇甫之先自宋子姓在漢中葉著籍安定涼州三明度
遼為盛曰太尉嵩武烈忠勁迨至士安以文雄鳴後其
苗裔綽綽此令惟君潔修敏于從政其所更歷實與名
並誰毀誰譽患于難明彼宜有功顧詒譏評是故君子
安之若命君允蹈之不侮不競覆審而明不失其正君

持止足以往自鏡告老辭歸匪耄匪病拜家為郎是謂
延慶生有成績歿有遺稱刻銘幽墟以讚以詠

著作佐郎周君墓誌銘

君諱喻字彥博姓周氏其先潁人唐之末世有謫官道
州者更五代之亂因家焉君父諱堯卿仕至太常博士
以善居喪聞廬陵歐陽公稱之曰其情與禮稱古君子
之孝也為之墓刻博士娶黃氏金華縣君生七子君其
最長君幼而敏慧讀書作文章浸浸有立既冠則能從

進士舉有司以冠諸生會以博士憂去執喪哀戚甚家
至貧奉母夫人養諸弟謹備而葬禮無違鄉里稱之既
免喪益務廣學刻苦自彊其于五經春秋為最深著而
為說其接交朋儀貌嚴整就之則溫然有容講論誨切
條理次叙人皆畏而愛之稱為先生長者皇祐五年以
進士登科調鼎州司理參軍聽獄察詞明敏過人州郡
恃賴之薦其可以長民遷荆南監利縣令瀕江漢築堤
數百里民恃堤以為業歲調夫工數十萬縣不足取之

旁縣然歲常決壞則廬舍田畝皆為魚鱉居及君為之
身自行視得當水衝者十餘處益工高厚築之是歲遂
不復決役民大省其後二十餘年民猶能指其處曰是
周令之力也每縣邑有致民事君為書揭之通衢百姓
見之奔走相告無一後期者曰令所以不使吏居間以
不擾我我其可以違之有後至者輒相咎責又以薦者
言改著作佐郎知臨江軍新淦縣事江南劇縣新淦又
其難治吏與民交通綴結為姦獄訟有累年不決者君

至以方畧求吏不得轉側立百姓庭下為之剖判無不
愜服南方人性皆慧黠既知其不可欺偽訴訟則大衰
息數月縣無逋事未暮年君以疾終吏民懷其惠悲傷
之寮友愛其材痛惜之年四十夫人江西黃氏大理寺
丞灝之女灝喜為文章以豪氣自負一見君以為奇以
女歸之生三子紳緯緄君與諸弟居友愛教飭備至至
其子就學則未嘗有所問夫人問之曰視吾所以為諸
弟則所教者多矣識者以君為善教君既歿夫人誨勵

諸子甚有法度後若干年紳遂以進士成名以祿為養
今為瀛州推官知衡陽縣事緯組亦業進士皆可冀其
有成女子二人長嫁宣德郎李如璫次嫁推官范汝中
君有文四集十卷藏于家其卒以治平三年三月二十
一日即其年殯于荆南石首縣後若干年卜得吉兆于
某所用某年月日襄事君之祖諱仁遂贈刑部侍郎祖
母唐氏贈仁壽縣太君與君考妣皆葬道州云銘曰
蓋求良臣必于孝子萬石家行不言而治豈其一身子

孫娓娓非若跖弛之士叨竊一時後不足齒周君之先
篤孝以禮其所繼承奕世一體何以效之文采操履祿
不及豐令名昭矣刻銘其藏以告萬祀

處士龍泉何君墓誌銘

處士諱君平字少嚴世為處州龍泉人三世未嘗仕處
士初以進士舉久之無成乃歎曰夫有命者信不可以
力求也我其已矣退而郊居蓋年始三十云以讀書為
娛自經史諸子傳說以及佛氏外典多手自寫錄或能

閤記為人簡易溫厚中心不隱以故人益親而樂之其
出在道塗逢之者必為引避而士大夫之至門者係踵
不絕處士尤喜賓客具酒食相與勸譙未嘗厭倦事有
不得已則來至城郭久或十年七八年乃一到家貲靳
靳粗給付畀妻子未嘗以為問有勸益殖生業者輒曰
幸吾兒宦學有立吾業廣矣已而果然處士長子執中
以文學應進士選名在第五鄉里翕然皆曰為善之報
執中調為台州推官而國子監欲留以為教授官執中

不肯曰台州適吾鄉里又有天台鴈蕩山水之秀吾親所安也迎處士之官人益以為榮處士年六十七以元豐五年五月十九日終于龍泉豫章里第其年十月甲子葬于某所處士娶李氏生兩男子執中之弟名執德一女子嫁吳時中處士之沒執中時為亳州觀察判官吾僚也使州學教授劉跂以行狀告而請銘跂曰吾多識君鄉人道君事為詳乃為銘曰

士之生世有志有願或游說萬乘以取貴顯若歸守墳墓鄉里稱善文淵少游孰隱孰見惟何君之久幽亦曰

適已自便克有令子為邦之考故吾銘其藏辭不愧悞

季弟青溪縣丞墓誌銘

季弟青溪縣丞某字儀某七歲以先公歿遣表恩補太廟齋郎年二十二調河陰縣主簿再選為滑州司法參軍會州廢為白馬縣罷歸而青溪初增置丞君以選授君幼敏銳有性格讀書學文及為政效官皆有思致親舊譽之上官倚任之歲期以遠到取清河張氏尚書郎中誼女生一子方進在青溪歲餘以習法律求試有司

至京師以後期不及試歸未至家張氏卒後五十日君亦終時某年月日也家在蘇州即殯蘇州某佛舍後六年歲在辛酉祔葬于東都祥符縣魏陵鄉祖考塋以張氏祔致君之喪來北者從兄父伯裕叔懋方進時年十歲吾時為兗州皆不得親君葬襄事惟諸從子弟實某月某日云銘曰

先公嘗為青溪佐後六十餘年而汝復官于此父老有記先公善政喜汝似也宗族亦期汝遠大而短命不幸

可悲矣乎銘以誌悲已而已而嗚呼噫嘻

兄子定國墓誌銘

仲兄長子定國字伯于幼能誦書敏于記覽才十餘歲
五經略皆上口旁及諸子史書往往成誦仲兄平生好
經書為春秋學尤深邃嘗曰是兒當盡傳吾學定國習
為進士詩賦詞章捷速精緻見者皆驚賞以為老成善
隸書字如刻劃可愛性專一端靜未嘗有子弟過而勤
學刻苦不舍晝夜外無嗜好不幸短命十八歲而卒嗚

呼揚子雲稱童烏九齡而與玄文人皆疑子雲之言以
玄非童子所能與也如仲兄之知定國謂其可以傳學
孰曰不可與哉子雲知童烏審矣非欺人者也定國以
祖蔭為郊社齋郎後補掌生其卒仲兄時為知制誥知
揚州事後十二年仲兄棄世明年葬祥符縣魏陵鄉祖
考墓次定國祔于兆域之南少西叔父暨其弟奉世襄
事熙寧二年十月二十八日也銘曰

孰稟以為爾生孰賦以為爾命其有相之邪胡志氣之

盛具有奪之邪而天關不競其皆偶然者邪嗚乎志悲
于斯銘

彭城集卷三十八

欽定四庫全書

彭城集卷三十九

宋 劉攽 撰

墓誌銘

金華縣君范氏墓誌銘

夫人姓范氏尚書職方員外郎韓公繹之妻父諱雍某
官諡忠憲公府君之考某官諡忠憲公惟韓氏范氏在
春秋皆為卿族大家子孫相承世多顯仕婚姻敵耦必

將有聞惟夫人幼鞠于母仁壽郡夫人臧氏教婉誨善
令德有成及歸于府君恭肅修整嗣繼宗事無不時當
性不喜華侈雖生富貴而嬪于大族有以自持不從時
好也府君晚而為浮屠老子之學精志勤力將以悟道
而致永年夫人聞而悅之相與一意戒警不怠薄滋味
絕游燕亦其天質近之而所聞所習者專故善易入云
爾夫人以府君貴封金華縣君治平二年府君卒夫人
持喪哭泣哀思如禮四年正月以疾終年三十二子男

四人長宗哲大理評事次宗弼太常寺太祝次宗敏皆
前夫人所生獨幼子宗謹夫人所出而早死不育熙寧
二年七月某甲子諸子壟夫人祔于府君之墓使來請
銘乃為銘曰

淑慎自修用宜其家謂之賢乎而不壽邪以歲之令以
禮之盛葬從其先姑尚利于其姓

樂安郡君范氏墓誌銘

夫人姓范氏相國司徒魯公諱質之曾孫相國太尉諡

文正王公諱旦外孫今樞密副使吏部侍郎韓公之夫人初文正公嫁二女適范氏諱令孫適韓氏是為忠憲公范君以辭學登進士科年三十餘為朝官雅意高邁薄厭仕宦求還田里朝廷嘉之以為左正言致仕而忠憲公出入內外惇懋功業綱紀國體厯踐二府謀猷贊元官至某官以某官告老歸第二家相與恩好甚篤約世為婚姻故夫人歸于樞密公夫人端直淑茂天資挺立柔順足以成德正固足以幹事忠憲公治家嚴謹夫

人承意從教備盡婦道及忠憲公薨家婦早世宗事一
主于夫人族人百餘口夫人存撫教育之同其有無未
嘗少自異人人歸心其外則收恤姻婭贈遺慶弔親疎
皆有禮意如是者三十年家始貧乏其後祿賜益增而
姻族益廣施予益博人皆曰其寡約得致其意而無遺
其富有得盡其禮而無偏是難能也忠憲公薨二息女
尚幼及公兄舍人棄世其孤未婚嫁者又七人夫人視
之如已出十餘年間娶婦適人裝齎聘幣纖悉備具待

遇妾媵樂易有恩至有所整肅亦莫敢犯者歲時祭祀
潔齊盛服以身帥先之樞密公每出使在外夫人則亦
深居不出不過諸親家雖朝廷盛禮可觀未嘗一往也
世傳韓氏家法莫不師仰之皆自以為不及樞密公始
升朝夫人封壽光縣君及為翰林學士擬封高平郡君
南郊推恩進封樂安郡君夫人一子曰宗師甚愛之而
誨勵備至自為童孺不假借以顏色嘗曰汝母以門戶
光顯身有官秩而自怠也讀書為學繼而父兄且吾獨

有汝用汝為慰宗師亦敏銳夙成遂以進士登科及夫
人存為祕書丞夫人又嘗曰而雖能成名吾猶當觀而
從仕與而御家及樞密公鎮成都留家不以自隨宗師
侍夫人為鳳州判官凡再歲郡人稱其材夫人一女子
嫁外家進士范紳實正言之孫是時正言妻猶存夫人
不以適他族曰以吾女養吾母足矣與紳皆早夭夫人
從樞密公治蔡州得疾既有瘳乃著道士服讀釋老書
盡以服玩施浮圖氏家事總綱領而已後八年年五十

三終于京師某里第治平四年五月六日也于時樞密公為三司使天子使中貴人歸賻禮甚厚內外族人之至者皆號啼盡哀其恩有以固結之矣後數月樞密公進登西府明年同天節求追錫冠帔天子許之熙寧二年七月某甲子歸葬于許州某縣某里祔于忠憲公之墓次惟夫人懿德淑行內外之盛詩史所稱不能過也垂示來裔不在斯銘乎乃為銘曰

詩稱韓姑爰始蹶父東宮邢侯乃詠齊女孰與夫人威

族之華兩相四公內宗外家性淑德修孔惠孔時可以
化邦不寧母師沐浴之封以啟名城屈伏魚軒乃後其
榮兆宅陰泉萬世是期勤銘篆詩孝子之思

德清縣君周夫人墓誌銘

夫人姓周氏考諱某為樞密直學士戶部侍郎贈刑部
尚書以剛直為朝名臣妣劉氏彭城縣君夫人天性柔
靜莊重不妄笑語為女工織密巧綴點蘇為花卉蟲魚
若生就然又通曉音律年十七嫁為北平榮弋妻逮事

舅姑恭順得上下歡舅姑繼歿服喪六年以孝稱從其夫仕宦夫登朝封德清縣君夫官至尚書屯田員外郎以病求分司南京夫人董正家事內外稟受而營視醫藥及兒女婚嫁皆得其儀夫人本大家名族榮氏亦素顯盛及夫病夫人雖力家事有序不能無鬱抑失志浸以成疾某年月日終於鄆州私第年四十六子男二人長曰撫太廟齋郎次曰某尚幼夫人之終撫時舉進士京師奔歸在大殮後女子五人長嫁某州錄事參軍錢

豐次嫁太廟齋郎王礪餘皆幼某年某月日祔葬其縣鄉先姑墓次銘曰

婦恃于夫乃病自退子可以立又年不待柔順靜專非所獲戾其命也邪于是乎在

孫氏母莊夫人墓碣并銘

熙寧元年八月秘書省集賢校理孫洙巨源將葬其先人以書告曰不肖不幸至于大故惟是棺槨封丘之在于禮者不敢不深長思以無憾于心昔我皇妣之祔于

先姑于茲二十有五年宰木成林今而與先公別藏異
竊懼無以為表識誠得揭辭墓左以詔來世不肖之願
也後數日復使夫人之壻都官員外郎丁謹以狀告某
于巨源為同僚且世有舊于是次叙其語而刻之夫人
姓莊氏廣陵人幼則柔順孝于其父母年十九嫁為同
郡司封郎中孫公諱錫之妻端操淑行不妄戲笑動皆
中禮服用潔清給足而儉約不華事舅姑飲食衣服必
手調鉅絳紉之未嘗以委他人孫氏累世富厚內外宗

族衆多婦女所以和順好禮門內無爭鬭事由夫人身
化之也是後有來婦孫氏者舅姑必曰汝學莊氏婦女
子適人者其父母亦曰視莊氏婦云府君諸父五人二
人先死其妻求異居府君之父悉推田宅予四人者獨
攜府君徙揚子曰吾賴吾子仕宦興吾家而諸母之愛
夫人者私以白金數百兩予之夫人曰舅姑推財而已
受之是欺也固辭不取已而府君登進士第歷官州郡
至國子監直講蘇玉宮伴讀夫人佐助其夫有常法度

其從在官約制鬼子童僕謹慎非飲食所須不妄市一物性好佛書讀之能通其義生七男子湜澄涿淵濟淑洙女子三人涿嘗病暗不能言醫治萬方不愈夫人為齋褻心禱仰天祝而呼之應聲能言夫人年五十寶元二年六月五日終于京師終後四年以慶厯四年十一月十五日歸葬楊子縣懷義鄉及府君之喪湜涿淵濟淑皆早卒長女子嫁內殿承制傅夢臣次適大理評事楊閔少則丁諲妻傅氏丁氏婦亦先死楊氏婦嫠居集

賢君與其兄前楚州寶應縣主簿澄襄事夫人之生雖不及府君之顯而以良子孝思烝烝不忘猶夫人存也道揚徽美慰凱風之思乃為銘曰

孫氏大家我聞其初以義帥恩妻承其夫惟時夫人端靜恪勤興于其躬施及族親孰將來婦彼亦有歸一視于莊為汝得師夫榮于朝壽考其艾夫人閔焉曾莫之待孝子追遠思深以長續美緒休煥其有光墓木我我厝之豐石鑱詞繫詩以繼在昔

舅氏華夫人墓誌銘

舅氏凡七族某為兒童時皆嘗及見焉是時外門名官
皆未大立而諸舅以才學幹力進取聲聞藹然其門內
之治婦事謹嚴惇篤娣姒相親睦無間世以為美談是
後仕宦者益顯榮于朝妻皆有封邑蓋為善之報積厚
使然乎治平初唯華夫人存三年夫人復以壽終自其
始見至此四十餘年盛衰變易雖固人理之常然亦可
為大哀矣內兄汲令漢臣孝弟篤厚君子也居喪如禮

舉夫人之樞祔于先府君之塋請銘于我某以凱風渭
陽之思常戚于心冀有以申之故其為銘無辭夫人姓
華氏平原人魏太尉歆之後晉末渡江居晉陵又徙餘
杭曾祖先業祖興嗣皆仕錢氏後興嗣入朝為金州石
泉令父輯衛尉寺丞夫人年二十一歸于郎中府君諱
冲以府君封平原永壽馮翊三縣君夫人自幼至老婦
道母儀稱于其族人其族人固當世之所稱美而夫人
有加焉則其賢可計校等級而知也夫人為王氏婦四

十七年而府君卒夫人從其子仕郡縣又五年七十七歲而終其沒也以治平三年十月丙辰其祔也以熙寧元年八月庚申汲縣之弟曰直臣楚丘縣尉彥臣未仕皆夫人出也女子三人長嫁大理寺丞尚穎次屯田郎中孫珪皆先歿次嫁進士馬臨諸孫八人其葬宋城縣仁孝鄉某里銘曰

舅氏之盛爰始七族其能其才其祉其祿外治有嚴內教亦修人格于善年長則尤夫人壽考乃獨後終是為

女師令聞顯融歲協于姓日維其祥祔于公墳萬世永
藏

韓刑部妻程氏墓誌銘

尚書刑部郎中韓君玉汝娶于程氏僅三十年君為陝
西轉運使夫人以疾薨京師方是時西戎有疆事虜主
新立君經度約束持節界上不得顧家夫人之卒既三
月乃得還明年將葬于許昌君復泣秦州獨諸子裏事
以書告曰夫人之終不得歸視葬不臨穴其悲無以寓

願以累子銘之使其懿美垂後不忘可以少自慰云于是叙其語刻之按程氏其先中山博野人夫人之考曰琳鎮安軍節度使檢校太師同中書門下平章事贈太師中書令兼尚書令魏國公諡文簡母陳氏號魏國夫人夫人天性靜專自幼少不妄笑言不起游觀及嫁逮事舅忠憲公婦道修備宗族懷而愛之從刑部君仕宦整肅門戶非內事不及口有賓至身自主饋視爨燎雖盛暑不憚又喜誦佛書一志不怠凡有血氣之類未嘗

身踐也教誨諸子皆有法度始夫人嘗從母入謁禁中
仁宗皇帝以大臣女錫之冠帔及刑部君登朝封萬年
縣君夫人之終以熙寧元年八月九日年四十九葬以
明年七月二十七日長子宗恕前蔡州汝陽縣主簿宗
武前滑州司法參軍二人同年登進士第少子宗魯太
常寺太祝一女子許嫁郊社齋郎滕公立二人皆先夫
人卒其餘男不及名女未笄者又數人云夫人之葬實
祔于忠憲公之兆祖姑氏鄉曰某里曰某銘曰

婦志于順惟悌孝妻從于義實求好子材可稱繫母道
具是三美壽不報讚銘埋幽寓悲悼

永安縣君張氏墓誌銘

永安縣君張氏者相國晏元獻公之冢婦祠部郎中成
裕之嫡妻也夫人家世河南人曾祖誼為中書舍人贈
工部尚書祖去華工部侍郎贈司徒父師臯駕部員外
郎初元獻公自樞府罷以某官知陳州事駕部君才為
州節度推官元獻為子擇婦獨以張氏為宜而駕部君

亦自以家世華顯思女之才不以大小敵否為間也及
歸果稱良婦事舅姑以孝聞元獻薨有三男子四女子
幼稚夫人養毓調護皆至成立娶婦嫁夫益其勤瘁寘
力凡三十餘歲云夫人生六子清太子右贊善大夫章
猗紬宜皆大理評事齊太廟齋郎女子一人夫人年五
十七熙寧二年九月十一日以疾終于京師某月日歸
葬于許州陽翟縣元獻公墓次蓋夫人晚而喜佛書不
飲酒食肉衣不文繡其處富貴大家而刻意誠心為所

難能者其又可尚也已銘曰

為息擇偶為女求士二父之志皆以知子故歸而宜其
家人長而宜其子孫壽不至于耆耄有命也存嗚呼于
千萬年尚無壞茲墳

聶夫人墓誌銘

潁川韓宗道持正將葬其妻請銘于予以狀告曰夫人
固知命者往數歲夫人嘗病甚急醫者以為憂夫人神
色安然不知死之為可惡也或勸使呼兒女來前夫人

止之曰彼且啼泣亂人意無益病後愈夫人盡去金珠服玩斥不復用更為道士服而誦浮屠書後二年告宗道曰得不祥夢自以為當死死不暮歲矣自是數與姻族語語若訣別而曰不可易者命也未嘗以為戚戚餘果病自為送終服比其化也不少恐懼變易焉夫人歸韓氏若干歲矣其在父母家幼則明悟不為嬉戲七歲讀書史能為詩曉音律聰警過人性和柔謚靜未嘗有懈惰色父母尤賢之故詳擇所宜而歸之其嫁也不及

其姑叔妹之未婚嫁且十人先公既見夫人所為喜曰
此賢婦也吾不復念家事矣及先公棄世自後十餘歲
所以撫鞠幼稚皆盡其恩意始終如一凡夫人之為婦
又若此云蓋持正之學喜論無生而貴知命著故知其
妻之賢有以也夫齊死生者不以大變惑已其以人之
所無憾為夸詡乎吾又以知持正之言信也夫人姓聶
氏父為某官其卒也年若干有子三人曰某某某一女
子皆幼其死以某年某月某日葬以某年十一月某甲

子持正時為太常博士云銘曰

生所慕也死所惡也世俗以為憂而夫人不懼也夫也
知之乃道其賢銘以寘幽于千萬年

彭城集卷三十九

欽定四庫全書

彭城集卷四十

宋 劉攽 撰

雜著

設常侍郎對

漢景帝用晁錯為御史大夫帝過郎署見常侍郎問曰
吾以錯為三公人以謂何如常侍郎曰幸甚陛下之知
錯也以錯為大忠焉爾陛下之用錯也以為錯大材焉

爾帝曰固然常侍郎曰錯不變更高皇帝約束陛下不
以為材錯不別疏人骨肉侵刻宗室陛下不以為忠然
則高皇帝約束雖仍舊不可得矣諸侯雖欲無罪不可
得矣帝曰何哉常侍郎曰錯潁川男子也文學不能以
出衆容貌不足以動人使居鄉里勢不過得為掾功曹
錯不願也錯峭刻為忠而陛下信之錯非苦為材而陛
下用之錯今為三公富貴榮顯然則極錯所欲盈錯所
願漢安得無事諸侯安得無罪乎帝曰吳王詐疾不朝

久矣其罪大今削之亦反不削亦反常侍郎曰先賜吳王几杖不朝數十年矣吳王漸漬恩德雖圖不善不忍為也陛下今使錯發之吳由錯反而謂不削無錯吳何為有謀乎帝默然常侍郎曰語有之曰變古亂常不死則亡是天道也階下雖固愛錯不能違天錯將有大怨侍郎謝死罪居三月七國起兵帝憂懼要斬錯以謝七國然後知常侍郎為賢者也

書李廣傳後

李將軍英毅果鷙謙讓不入可謂名將矣然而功不至
封侯者非其人之智失也又非時人之勝已也幸不幸
有命也已矣世之君子全道極美而功名不顯者亦何
可勝紀哉然君子之道得於人必反諸其身違于天必
復諸其心故禍福之至曰已有致之是以上無怨而
下無尤也李將軍追咎殺降者以使已不封能自訟矣
嗚呼可謂非篤厚君子哉

連珠一首

蓋聞詭道取勝得以暫用懷惡致討未有能克是故以桀詐桀可容于微幸用燕伐燕不足以相服

進士策問

問古者藏冰以禦電災禁原蠶以蕃馬四時改火以救民疾出土牛以送寒氣夫天人相感皆以其類凡此數者其說謂何且其說皆春秋周禮月令聖賢之記非鄙近淺陋所傳述者諸生毋以不通而輕沮毀之也

問古有宗子者以管領族人今不知其說如何為之者

何人分大小者何故領族人之狀何若累世之後有所斷絕否今世亦可行之乎當為明說焉

問古者議事以制不為刑辟今國家憲章完具毫髮以上皆存約束而言治者嘗曰不盡人情其為吏者皆便文自營無惻隱之實以故政事多不及古或以為宜簡節而疎目求忠信之士敦龐之人以付之夫人不易知恐未獲議事以制之美而矯虔吏舞文以害民矣二者宜何從願與諸生議之

旱禱文

伏以賞功罰否率由陰陽之權旋時過期實繫至誠之
感臣自惟淺器濫預長人政術弗修德馨蓋闕間者旱
氣為沴穡夫鮮功閔焉雲漢之憂遂及肅霜之序農畝
弗墾宿麥過期懼染盛之不供而鰥寡之重困是用反
身思咎潔誠謝愆闕靈場之謹嚴誦仙章之秘奧庶茲
悃悃仰達高明伏冀降鑒自民上德生物拯此焦勞之
患昇其膏潤之恩霖雨以時豈特雲霓之望黎庶無憾

更知芻狗之仁

太清宮旱禱文

伏以洗心首過情衷可以必聞旋時過期昭鑒未嘗無
報臣濫膺朝寄忝職郡符刑政弗修疵癘為閔粵從春
序時雨愆期顧彼農民衆心失望密雲屢布而復褫疾
風亟發而若驚宿麥就實而弗登嘉穀當種而弗入民
罹饑饉之苦于此累年家乏擔石之儲鮮不菜色大懼
流移道路荒棄田萊是用躬造殊庭歸依鴻造守土無

狀或許其悔過而自新比屋可哀必冀于加惠而孚佑
霖靈滂沱萌實茂堅幸昊天弗渝亦神祀之無乏

中嶽禱雪文

今茲冬多愆陽雨雪不時雲氣數布風颭暴起宿麥枯
瘁人且疵疫守土無似刑政失中不能自媚于神實致
此咎洗心自新是用乞靈于百祀神祇惟天子之所命
敝邑之表望莫如在廟之神矜其淺智不逮之罪軫百
姓將絕之憂惠澤以時嘉穀無隕蒙賴靈貺其何有極

敢告

謝雪文

蒙神之賜致此甘澤疵癘不興濡土潤麥匪我精誠所能昭格在神聰明庇民大德潔凈豐盛陳列邇豆左右僚屬載拜稽首是用為報率我常職神其格之以饋黍稷尚饗

吳山禱晴文

吳嶽在隴州去鳳翔僅百里其山秀特磅礴與

五嶽相類不與凡山等其神甚靈其禍福於民
如答于是秋苦雨故予為文禱之

判渾茫以融結兮肇川嶽于坤輿五山峙而相望兮茲
網紀乎中區慶西荒之遼夔兮邈萬里而有餘伊帝命
以主民兮曰喬嶽而惟吳峻千尋而直上兮亘西方而
不極叢巖鬼鬼而干霄兮白日過而如匿晚玄雲之漫
漫兮夫豈知乎懸崖之孤石氣清淑而淳粹兮姬陽春
之膏澤忽變色而震怒兮何風霜之慘戚諒好善而懲

惡兮茲天威之咫尺彼下民之喜仁而畏欺兮夫孰非
神之幽隲歲困敦而陰霖兮秋既成而弗獲氣昏昧而
弗離兮雨淫洸而互作川谷浩乎為淵兮高原墟而為
壑彼下民之無辜兮曾弗究而弗度雲闐闐而不收兮
鬼嘻嘻而為虐疑聰明之惑蔽兮何帝令之沮格不然
跼炳靈于百里兮又明神之所作扣帝闥而且達兮不
若吾神之可以獻忠縛咎屏翳兮放誅豐隆揚百川使
清靈兮詔蜚廉使來風掃除昏翳兮天地清通白日揚

光兮悠悠太空田有嘉穀兮穡人成功我民欣欣兮報祀其豐神之德兮長無終窮

禱晴文

霖雨為沴越月厯日麥既秀矣陰不得育前歲饑阻民或菜色奈何復之鰥寡愈感百姓非神主邪水旱非神職邪神將弗聞我是用告翕息雲陰日光照赫尚庇黎甿以敷大德敢告

王深甫哀辭

嗚呼深甫嘗自以為不壽亦亟為予道之按六物與五
辰迺言命而稱詩神峻清而骨單吾固亦以君為疑
何茲言之竟果其夭閔而止斯吾固知夫天命之默定
非賢哲之可移強學問而力仁義彼蒼蒼焉冥默而莫
知夫神之不可滅精之不可虧莽太空之浩蕩若孰往
而疇依審與夫顛顛兮異矣復何怨而何悲夫死生其
猶夜旦之常邪顧有合而必離彼修短胡足言乎計彭
祖之與嬰兒念至理之昧晦知之者不如信之以誠之

為愈也然固望之而未至聞之而弗窺此顏生之不幸
猶壹慟于宣尼矧吾徒之缺然宜為若而涕洟

祭陳相公母某夫人文

嗚呼五福之先莫重于壽壽者雖多鮮克貴富或身顯榮
親不待留夫人之福四世之祐以賢為子名譽長懋國
相之養萬石其厚黃髮兒齒踰八羸九詩頌魯侯慶云
壽母馮勣胡廣在漢稱首夫人況之彼焉何有命乎考
終靡憾靡疚某等備位小邦皆有官守喪車來東不敢

金匱要略卷之四
奔走恭陳薄奠藉詞為侑

祭亡弟縣丞文

前年四月汝來見我念汝當官才高志果于以求名往
無不可故我別汝思而不傷汝行無幾報汝婦喪十旬
未半汝繼以亡何辜如此不淑不戚豈我不德底此咎
殃我心猶疑謂汝在官後來不歸一別終天我年向衰
六十有幾前喪汝嫂兒女失恃我矜汝孤誰與撫視我
重傷悼髮白目翳日月流連爰及祥祭几筵將徹在禮

有制招延淨寺廣作佛事益乎無益自盡人意冀汝以
詞靈其髣髴

祭亡妻潁陽縣君韓氏文

嗚呼日月不居節序代逝傷悼如昨忽焉周歲追惟話
言衍衍令德惟祔未更宛然餘澤情懷摧割有涕連沔
泉壤冥漠詎復我知素心依佛覺悟至理超生淨土想
必去此禮制有經明當變服奠觴陳詞祔筵以哭

祭王景葵文

惟公忠以衛上簡以正己節惠之光兼此二美生榮沒
哀前聖攸臧僉論所同公也不亡歲月之吉歸葬舊封
宰木有嚴天子之公某朋舊之好執紼是宜守官鄰邦
遠莫致之恭陳薄奠告公以心靈寶有知庶亦來臨

為人祭唐給事文

惟公之生志氣潔修清不可渝如川之流博學瞻辭既
以周用尺牘之珍又衆所共金華深嚴多聞是資出入
兩朝天子器之胡天降年福不售德修途方騁脫軸煩

輒嗚呼哀哉某夙以姻婭得從僑游哲人之委使我心
憂觴豆雖陳公豈來臨文以叙悲公知此心

祭張龍圖文

惟公亮直自躬儒術映時緣飾彬彬動為吏師大邦維
屏天子是毗所居赫赫去而見思金陵都會朱邱始封
大新城宇百堵穹窿洛師汝陽周魯遺風二邦美化于
古比崇龍馬近臣柄輔儲侍將哉相哉故事多矣天不
憖遺公胡不俟殲我良碩奪茲重器嗚呼哀哉某昔以

庸虛預居下僚從事別都匪夕匪朝親際軌範躬服教條薰而炙之德音孔昭奄承訃聞震悼曷已守官小邦去公千里欲奔不能疚心如燬酒肴匪馨恭致常禮

為衆人祭王十八學士文

嗚呼君以文章奮志發身施于為政寬而利人凡出從事傳古則迂便文自勞又非遠圖君實精心處躬不疑所居可紀去而見思南毫之都全吳之疆饑饉薦臻民卒流亡田萊既闢百堵還定問誰之勞復此完盛上嘉

成功並降命書東暨海邦北維參墟膂力方剛經營是
宜金印紫服爛其有暉傳車在門揭節諏日旦不能朝
君忽卧疾賓來問君笑言自怡揆此吉人何慮何疑疹
疹發中變若翻水晨夕俛仰君遂已矣福善之說古或
不信導引而壽君復自慎莽然臻此不可推測豈天有
命雖聖不釋君齋所懷不得盡施以生者懷重君之悲
某等辱從君游交契攸久豈伊異人兄弟甥舅哭君之
傷情鈞意同丹旒有翩君喪遂東悅然語言暫然眉宇

不見不聞邈然亙古潔饌豐盛清酒在樽一別長絕寫
心此文

祭邵龍圖文

嗚呼昔公之西擁節部符千騎上頭蘭輅前驅邛郫之
險其足言歟賢賓去門弔者在廬禍福倚伏一盈一虛
今公來還丹旄首途素幕蕭然斂衣塗車天理何常不
亦悲乎嗚乎哀哉惟公志節清修早自挺立儒官詞林
栗階躋級司言石垣哀職補緝遂主邦計咳賦經入蜀

城會繁民俗輕急清德鎮浮有命既集百里之塗半于
九十公實中絕車摧馬繫凡我僚舊皆昔朋執殯來存
公易笑以泣陳觴叙誠惻愴於邑公實臨之誰謂弗及

祭賈中丞文

嗚呼詩書所稱君子正直廉端隅方以近有德古今材
良勉懋自力孰與天資不為外飾維昔宣尼隕涕叔向
史魚兩如潔修莫尚矧惟公賢時所仰望殄瘁之悲為
國悽愴嗚呼哀哉公在中司懷其毅氣如玉之瑩蘆而

不剗表正衆物彼曲吾避陳善責難致君無貳神之聽
之景福謂何曰仁者壽公在則那淮陽卧治汲直病多
公復不能獨寐無吽嗚呼哀哉昔公之門居無雜賓貧
賤之交在我數人情以義鍾哀以志申有涕沱若沾袍
隕神喪車于南邈馬千里有泗有淮壽母稚子奠公國
門公歸已矣公不我忘顧此肴醴

祭吳中散辦叔同年兄文

慶厯之六同荷名第四十年間恍如暫寐逝者所餘一

才三四見公荊州以是為嘻為百老圖如公存意別公
無幾公復不諱天命有定固不可避惟公壽算官爵名
位雖不大達方古無愧克有令子門戶不墜交朋之情
既老必異追公昔遊恍懔隕涕喪車北還丹旄曳曳撫
棺一呼引紳收淚奠酒伸詞公乎來既

為三省密院祭中書相公長男新婦文

惟靈作嬪清門慎德習訓積善在躬罔不信順日及隕
芳弱草棲塵如何不淑失此令人穀饌佳好清酒嘉旨

靈乎不遐歆此涼菲

汝州判司等攷詞

襄城縣主簿張堯卿第一攷

前件官久更事任頗積吏材迨此暮年亦無官謗其攷
可書中中

襄城縣尉寇仲閔第二攷

前件官勤于追捕濟以公廉卒徒服從器甲犀利其攷
可書中中

葉縣尉常琮第三攷

前件官追胥竭力教習有方惟其鮮萑苻之姦是以寡
鷹隼之效其攷可書中中

司法參軍王辟疆第二攷

前件官明辯足以亭法詳慎不以便文既久于官益勝
其任其攷可書中中

司理參軍王整第三攷

前件官操心近厚鞠獄正清其攷可書中中

梁縣尉兼主簿高贍第二攷

前件官莅事再稔取盜四人窮淵藪之姦可謂能矣貳
子男之課不亦多乎其攷可書中中

國子監補監生牒詞

國家以詩書禮樂教育諸生以德行道藝應選上下相
待如此其重雖未列于爵祿而士子已貴矣然國家與
人不求備故占小善者皆不遺之焉而諸生有志于古
人則其自任者宜勉之耳

曉示州學榜

據州學教授狀諸生不遵規矩及侮玩師長毀壞曉示者

蓋聞入孝出弟鄉黨之常節恭業樂羣庠序之要道諸生秀才結髮從學屈首受書大則希揚名而顯親次亦將干祿而筮仕何乃甘心佻達極意慢游以侮玩老成為高以抹撇箴規為達負固不服過涉至凶不足成名祇其敗德古者大學之教嚴師為先或收櫟楚之威或

重寄焚之謫非不能道德而齊禮蓋將糾繆而而繩愆
興言及茲良弗獲已為學至此不亦慙哉然而朝過夕
改君子所予先迷後得大易攸尚畏罪可以強仁克己
而後復禮特願勉親弦誦恪居朝夕勿重前咎以貽後
悔告示各令知悉者

濟寧總管府敦請武子先生主善本路學校疏
竊以化民成俗舍學校以奚先以善及人惟賢哲之自
任某等叨寄茲土俯愧菲才顧惟郡邑之氓素乏絃歌

之教雖泮宮之攸宇虛絳帳而無人幸遇良師克堪主
善武子先生德望足以服鄉里文藝足以為模範雅重
足以鎮輕浮安恬足以化僥倖有叩即應無問不知超
然天爵之尊允矣國人之式某等敢攄悃悃仰瀆高明
珠在淵而淵光玉處石而石潤物且乃爾人益能然與
其獨樂乎一身曷若兼善于萬衆謹同願學之諸子不
勝延佇乎清光願薰陶禮義之鄉謹佩服文明之訓異
日而為天下之名士不言而知先生之門人為國儲材

有教無類贊襄唐虞得賢之盛再清洙泗絕學之源千載流芳一時稱慶在後學多感多幸于先生不為不光罔敢多言敬備弁迂謹疏

修暨陽學宮疏

本學正殿雖新戟門未備樓危欲壓堂圯弗崇欲議增修何從取費非助我者孰能為之伏以天地之覆載皆知有帝王之師風雨所漂搖遂不見宗廟之美瞻我暨陽之學創于慶厯之朝來者皆視如傳舍之人去者無

必葺墻屋之計車不容而門壞廉太近則堂卑畫戟弗
修丹楹未備舍路寢孔碩之外皆朽木不彫之餘固知
子騫之言舊貫何必改作恐如安石所論後人將謂無
能本欲經之營之成之庶幾合矣完矣美矣然則欲毀
鄉校豈不為鄭國之羞僖公能修泮宮未必非魯人之
助用勸爾士各肩乃心

原註謝安石欲修宮室王彪之曰豈可大興工役勞擾百姓耶

安石曰宮室敝陋
後人將謂無能

欽定四庫全書

卷四十

彭城集卷四十